

All inclusive lo conoce impuesto mas halto

ORAJESTAD – Minister encarga cu turismo ta reuniendo cu cada un di e partidonan, ta reuniendo cu cada representante legal di cada partido y lo sigui cu e proceso di e dos cambionan legal, esta bin cu un vergunningstelsel pa all inclusive y tambe den futuro pa introduccion di un impuesto adicional pa all inclusive.

Durante encuentro cu prensa den fin di siman Minister Otmar Oduber encarga cu turismo a notifica cu e proceso di cambio di ley pa loke ta trata propiedadnan all inclusive y forman similar ta den proceso caba.

Banda di esaki tambe el a indica cu ya caba a participa AHATA di un di dos decision cu Gobierno a tuma, cual ta cu lo cuminsa e proceso pa crea un impuesto adicional pa loke ta trata all inclusive, un impuesto cu ta mas halto cu lo cual nos conoce na e momentonan aki.

Lo conta pa hotel existente tambe

E impuesto aki lo conta no solamente pa hotelnan nobo, pero tambe pa hotelnan existente. Lo mester sinta na mesa y negocia y Minister Oduber a compromete su mes cu AHATA cu den e proximo simannan lo sinta na mesa.

E mandatario a bisa cu a tuma e decision di bin cu e dos decisionnan aki pasobra mester salvaguardia pa futuro e bienestar di nos economia y nos turismo.

Den e cuadro aki sr. Oduber a comenta riba posicion di oposicion tocante e situacion actual, specialmente lider di oposicion Sra. Evelyn Wever-Croes, pero tambe Sr. Dangui Oduber y esun cu

a introduci e grupo RIU aki na Aruba, Sr. Nel Oduber. Ultimo dlanan ta purbando di bruha tera, pero ta algo cu e mandatario no ta bay drenta den discusion pasobra e ta considera cu ta trata di un materia di importancia demasiado halto pa haci politica cu ne.

Si e ta lamenta profundamente cu ta mal informa e comunidad aki purbando di mustra como si fuera cu tin leynan existente, cu lo tin un vergunningstelsel na e momentonan aki pa cual por djis sin mas cambia vergunning pa e hendenan aki no por opera all inclusive. “Esaki no ta corecto, ta p’esey nos ta papiando di un cambio di ley”.

Un otro punto cu e mandatario a presenta ta cu ta precisamente Sr. Nel Oduber, tata di parlamentario Sr. Dangui Oduber, na 2007 a gaba masha hopi mes cu ta el a trece RIU Aruba, cu ta el a trece un cadena di 5 strea di all inclusive Aruba.

E tempo ey Prome Minister hasta a declara cu ni cu si e ciudadadonan di e pais aki ta contra, ni si e trahadonan ta contra y ni si AHATA ta contra, RIU ta bin Aruba, pasobra RIU ta un bon cadena hotelero.

Awe, posiblemente pa condicionnan cu a cambia, oposicion no ta wak RIU mas como un compania cu tabata super bon pa Aruba, sino como un compania cu lo mata nos turismo.

Sr. Oduber a bolbe remarca cu ta considera e topico di all inclusive uno di demasiado importancia pa nos comunidad pa haci politica cu ne y p’esey Gobierno ta atendiendo cu ne na un forma serio. □